



7-123



نحو عثمانی

از  
سلیم ثابت



مدیر مکاتب رشديه

استانبول

ع  
(۹)

(مطبعة عثمانیه) ده طبع اولن مشدر

۱۳۰۱ نه





نحو عثمانی

تیم



اثر

سلیم ثابت



مدیر مکاتب رشديه

جناب فیاض منان نوع بنی آدمه عنایت و احسان پیور دینی  
عقل و عرفان دماغ انسانیده و موضوع و موضوع بر جوهر  
نور ایدر که انسان آنکه معقولات و محسوساتی درک  
و اذعان ایدر که اکتساب و استحصال ایلدیکی امور معلومه بی  
آخره عرض و افاده مراد ایتدکده یا بعض اشارات طبیعیه  
واسطه سبیل و یا خود بر طاقم مقالات لفظیه استعمالیه  
تفهیم و بیان ایلر که اشارات طبیعیه نك کیفیت اجر اسنه  
(لسان طبیعی) و مقالات لفظیه نك صورت استعمالند دخی  
(لسان وضعی) تعبیر اول نور

(اشارات طبیعیه) تنکیم اطفال و دلسزلرک و بعض کره  
دخی بزم استعمال ایلدیگمز اوضاع و حرکاتدن عبارتندر  
(مقالات لفظیه) عموماً افراد بشرک استعمال ایتدکاری نطق

و عبارتہ لدرکہ ہر لسانندہ موضوع و معین اولان کلمہ لردن  
ترکب ایدوب کلمہ لردخی اول لسانہ مخصوص اولان  
حرفلرک جمع و ترتیبندن تشکل ایدرلر

( حرف ) دخی ( دبل دیش خیشوم و دوداقلر ) کبی بعض  
اعضایہ اعتماد ایدرک بوغازدن چیقان صوت و صدایہ  
دینلورکہ اکثری لسانلردہ شکل و عددلری مختلفدر تنکیم  
عربلرک تلفظ ایلدکلری حرفلر یکر می سکز فارسیده یکر می  
بش و ترکیبده اوتوز اوچدر

السنه سائرده بعض حرفلر وارددرکہ لسان ترکیبده  
مستعمل دکلددر

الیوم صور مختلفه ده کوردیکمز اشکال حروف قدیم  
اولیوب مؤخرآ بعض قوم کندی لسانلرنده بولنان مخارج  
و صدالره برطاق اشکال و اشارات وضع ایدرک حروفات  
مخصوصه لرینی بالتعین رفتہ رفتہ لسانلرینی تنظیم  
و اصلاح ایتشلرددر

کتب منزله ده بیان بیورلدیغی اوزره الک اول الفاظ و کلماتی  
منالره وضع و تعیین ایدن حضرت آدم علیہ السلام  
ایسه ده مؤخرآ انسانلر تکثر ایتدیکجه قبیلہ قبیلہ اوتدیہ  
برویہ طاغیلوب هر قبیلہ بولندقلری موقعه کوره برچوق  
الفاظ و کلمات اختراع و استعمال ایدرک لسان اصلیلرینی



توسیع و تبدیل ایلد کیرندن بر طاقم السنه مختلفه حصوله  
کیشدر الیوم سطح زمینده معروف و مستعمل اولان لسانلرک  
مقداری سکر یوزی متجاوز اولوب بونلرک مخارج  
و شیوه جه بر برندن ممتاز بش بیک قدر دخی شعبه لری واردر  
السنه مذکوره دن انجق یوز قدرینک اشکال حروفی  
و صرف و نحو ی موجود اولوب دیکر لرینک مجهول  
و مفقوددر

بوصورتده بر لسانک تنظیم و اصلاحی اولاً اول لسانده  
بولسان حرفلرک تشکیل و تعیینی ایله الفاظ مستعمله نک  
املا و تصریفی ثانیاً کلامک ترکیب و تألیفی ثالثاً طرق  
افاده نک اصول و قاعده لرینی بر ضابطه حسنه تحتنه وضع  
ایتمکله حاصل اولور که کلمه لرک املا و تصریفندن بحث  
ایدن علمه ( فن صرف ) و کلامک ترکیب و تألیفندن بحث  
ایدن علمه ( فن نحو ) و احوال کلامدن بحث ایدن فته دخی  
( بیان بدیع معانی ) دینلوب بونلرک مجموعه نه بردن قواعد  
لسان تعبیر اولنور

ایمدی لسان ترکیده موجود و مستعمل اولان حرفلرک  
اشکالی معلوم و معین اولوب قواعد صرفیه سی دخی بر طاقم  
صرف کتابلرنده مسطور و مبین ایسه ده نحو جهتی

الآن برقاعده تحتنه آئنه مديغندن تعليم و تعلمی خصوصنده  
زجت و مشقت چکلمکده در

بناء عليه لسان مزبورك جهت نحويه سى دخى برقاعده  
منتظمه تحتنه وضع اولنه رقى تعليم و تعلمك تسهيل  
و تعميمى حقنده برچيغر آچلىق امور لازمهدن بولنديغندن  
اقدجه لسان تركينك مسائل صرفيه سنى شامل طرفى  
ماجزيدن برقطعه ( صرف رساله ) سى ترتيب و ترتيب  
اولنديغى مثالو بودفهمده ولى نعمت بى منتز پادشاه معارف  
پرورشهنشاه معدلت كسترغازى سلطان \* عبد الحميد \*  
خان افنديمز حضرتلرينك عصر همايونلرنده لسانمرك  
قواعد نحويه سنى مشتمل برقطعه نحو رساله سى تأليف  
و تنظيم اولنوب تيناً ( نحو عثمانى ) اسميله توسيم قلندى  
انجق بوبابده مراد عاجزانه م ابراز معلومات اولميوب  
محضا انساى وطنه ناچيرانه برخدمت ايتك نيت

خيريه سنه مستند اولديغندن بورسالهيه احاله

نظر بيوران ارباب كمال مطلع اوله جقلىرى

سهو و نقصانى لطفاً طرف عاجزانه مه

اخطار بيورملى رجا و نياز اولنور

و بالله التوفيق

## نحو عثمانی

بِسْمِ اللَّهِ الرَّحْمَنِ الرَّحِيمِ

( علم نحو ) کلامک ترکیب و تألیفیه کله رک موقع استعمالی بیان و تعریف ایدن بر فندر

( کلام ) مراد و مقصودی بیان و افاده ضمننده بسط و ایراد اولسان نطق و عباریه دینلورکه بر طاقم جمله و قیودات جمله دن ترکیب ایدر

( جمله ) دخی بال حکم ایکی لفظدن تشکل ایده رک مخاطبه فائده تامه افاده ایدن سوزدرکه ( فعلیه و اسمیه ) قسملرینه منقسم اوله رق ایکی نوعدر

بونلره مرکب تام دخی دینلورکه صورت ترکیبلی بروجه آتی بیان اولنور

### جمله فعلیه

فعل ایله فاعل و یا نائب فاعلدن ترکیب ایدوب حکمک  
تجدد و استمرارینه دلالت ایدن مرکبدرکه فعل زمانیلرک  
آخرینه برطاقم ضمیرلر علاوه سیله یاپیلور ایسه ده غائب  
صورتلری دائما مجرد اوله رق استعمال اولنور  
( یازکدی چیچکلر آچلدی ) کبی تنکم مثال مذکور  
ایکی جمله یی شامل اولوب جمله اولاده ( کلدی ) لفظی  
فعل و ( یاز ) لفظی فاعل و جمله ثانیه ده کذلک ( آچلدی )  
لفظی فعل و ( چیچکلر ) لفظی نائب فاعل اولدقلری جهته  
بوجمله لر فعل ایله فاعل و نائب فاعلدن ترکیب ایتشلردر

### جمله اسمیه

مبتدا ایله خبردن ترکیب ایدوب حکمک دوام و استمرارینه  
دلالت ایدن مرکبدرکه صفتلرک آخرینه کذلک برطاقم  
ضمیر نسبیلر علاوه سیله یاپیلور

مولا خالقدر بز مخلوقز ( کبی تنکم مثال مذکور ایکی  
جمله یی شامل اولوب جمله اولاده ( مولا ) لفظی مبتدا  
و ( خالق ) لفظی خبر و ( در ) لفظلری ضمیر نسبی  
و جمله ثانیه ده کذلک ( بز ) لفظی مبتدا و ( مخلوق )  
لفظی خبر و ( ز ) حرفی ضمیر نسبی اولدقلری جهته  
دخی مبتدا ایله خبردن ترکیب ایتشلردر

ایمدی بروجہ مشروح جملہ لری تشکیل ایدن اجزادن  
 فاعل و نائب فاعل ایله مبتدالره (مسند الیه) و فعل ایله خبرلره  
 دخی (مسند) دینلورکه بونلر کلامک اجزای اصلیه سندن  
 اولوب صورت استعماللری بروجہ آتی بیان اولنور

### فائده

جمله فعلیه لرده (مسند) دائماً فعل زمانیلردن بری  
 اوله جغی مثلاًو (مسند الیه) یعنی فاعل و نائب فاعل دخی  
 اسم و یاخود اسم حکمنده بولنان مصادر و ضمائر دخی بری  
 اولمق لازمه دن ایهده صفتلر دخی بعض کره موصوفلری  
 اعتباریله مسند الیه اوله بیلورلر

(چالیشان او قور و او قویان سویلور) کبی تنکم مثال  
 مذکور (چالیشان کسه او قور و او قویان کسه سویلور)  
 تقدیرنده اولدیغندن صفتلر مسند الیه واقع اولمشدر

کذلک جمله اسمیه لرده (مسند) یعنی خبرلر دائماً صفتلردن  
 اولمق و (مسند الیه) یعنی مبتدال دخی اسم و یاخود اسم  
 حکمنده بولنان مصادر و ضمائر دخی یا بلیق ایجاب ایدر ایهده  
 صفتلر دخی بعض کره موصوفلری اعتباریله مبتدا  
 و اسملرده خبر اوله بیلورلر

(او قویوب یازان هر یرده معتبردر او قویوب یازمق  
 هنردر) کبی تنکم جمله اولاده (او قویوب یازان)

لفظی صفت اولدقیری حالدہ مبتدا و جملہ ثانیہ ده (هنر)  
لفظی اسم اولدیغی حالدہ خبر واقع اولمشدر

### ❦ فعل ❦

معلوم اوله که ( فعل اصلی ) یعنی مصدر لرک فاعله نسبتی  
ملحوظ و معتبر اولدیغندن جملہ اوله مدقیری مثللو فعل  
فرعی لرک دخی نسبتی ناقص اولدیغی جهتله جملہ اوله میوب  
بلکه مرکب ناقص قبیلندن اولور لرکه ترکیب و استعمالاری  
آتیده کوستریله جکدر

بوصورتده اجزای اصلیه دن اولان فعلار یالکز افعال  
زمانیه دن عبارت اولوب بونلرده ترکیبده واقع اولدیغی  
صورتده دائما فاعلاردن صکره کتورلمک و اجزای جملہ دن  
محل فائده اولان جزء دخی فعللرک اولنده وضع اولنمق  
شیوه لساندندر

( فضائل اخلاق انسانی بختیار ایدر ) یا خود ( انسانی  
فضائل اخلاق بختیار ایدر ) کبی

ایمدی فعل زمانیلرک متکلم و مخاطب صیغه لرندن ترکیب  
ایدن جملہ لرده فاعل ایله فعل بیلننده مطابقت لازمه دندر .  
یعنی فاعل مفرد اولدیغی صورتده فعل دخی مفرد و جمع  
اولدیغی حالدہ فعل دخی جمع صیغه سنده کتور یلور  
( بن یازدم سز او قور سکز ) کبی فقط غائب صورتلرنده

مطابقت مذکورہ معتبر اولدیغندن فاعل هر نقدر جمع  
اولور ایسه ده فعل مفرد صیغه سنده دخی کتور ملک  
جائزدر

مثال ( افندیلر کادی ) و یا خود ( افندیلر کادیلر ) کبی  
فاعل

فعل معلوم کند و سنه اسناد اولنان ذاتی اشعار ایدن  
لفظدر که اسم و یا خود اسم حکمنده اولان کلهلردن یاپیلوب  
دائما فعلدن اول وضع اولنور  
( بن درسمی از برلدم برادرم کز مکه کیتدی ) کبی

نائب فاعل

فعل مجهول کند و سنه اسناد اولنان لفظدر که ادات مفعولک  
حذفیله دائما مفعول بهلردن یاپیلوب طبق فاعلار کبی  
استعمال اولنور

( مکتب آچلدی درس لر باشلندی ) کبی

فائده

جمله فعلیهلرده بعضی کده یالکیز بر فعل عطف واسطه سیله  
متعدد فاعل و یا خود نائب فاعله اسناد اولنه بیلور  
بوصورتده فاعل و یا نائب فاعلاردن بری متکلم اولور ایسه  
فعل مذکور جمع متکلم صیغه سننده واکر مخاطب

اولور ایسه جمع مخاطب صیغه سنده کتور ملک و بو فاعلارک  
اشرفی فعله قریب وضع اولنمق شیوه لساندندر  
مثال ( برادریم و بن مکتبه کیدیورز برادریم و سن برلکده  
کیدیکز ) کبی

بو صورتله تعدد ایدن فاعل و یا خود نائب فاعلار غائب  
اولدیغی تقدیرده فعل اکثری جمع غائب صیغه سینده  
کتوریلور ( افندی و مخدومی مکتبه کلایلر ) کبی بعض  
کره دخی جمله فعلیه لرده متعدد فاعلار تنازع طریقیه  
یا لکز بر فاعل و یا خود نائب فاعله اسناد اولنه یلور که  
بو صورتده افعال مذکورہ اکثری صیغه عطفیه و یا خود  
عطفله استعمال اولنور ( عمریمز کاوب کچور ) و یا خود  
( کابور و کچور ) کبی

### تنبیه

ادات تردید ایله تعدد ایدن فاعل و نائب فاعلارک فعلی  
اک صکره ذکر اولنان فاعل و نائب فاعل ایله مطابقت  
ایدرك دائما مفرد صیغه سنده کتوریلور  
بو حالده فاعل و یا نائب فاعلارک اشرفی فعله قریب وضع  
اولنمق شیوه لساندندر

( شومکتوبی برادریم و یا خود بن یازه جنم ) کبی



فقط عطفی شامل اولان نفی مکرر صورتلرنده فعل جمع  
 صیغه سنده دخی کتور یله بیلور  
 ( شو مکتوبی نه برادر م ونه بن یازه جغم ) و یا خود  
 ( یازه جغز ) کبی  
 صورت مذ کوره ده فعل دائماً مثبت اوله رق استعمال  
 اولنه جفندن بو حالده نفیله ( یومکتوبی نه برادر م ونه بن  
 یازمیه جغم ) دینله مز

### ❦ مبتدا ❦

برو صف کند و سنده اسناد اولنان ذاتی اشعار ایدن لفظدر که  
 اسم و یا خود اسم حکمنده اولان مصادر و ضمائر دن یاپیلوب  
 فاعلر کبی دائماً خبر دن اول وضع اولنور  
 ( برادر م شاعر در بن کاتیم او قویوب یازمق نه کوزلدر )  
 کبی

نتکیم مثال مذکورده واقع ( برادر و بن و یازمق )  
 لفظلرینه ( شاعر و کاتب و کوزل ) صفتلری اسناد قلنمش  
 اولدیغندن الفاظ مذ کوره مبتدا اولمش اولور

### ❦ خبر ❦

ضمیر نسبیلر واسطه سیله بر ذاته اسناد اولنان لفظدر که  
 صفت و یا خود صفت حکمنده بولنان کلمه لردن یاپیلوب  
 فاعلر کبی دائماً مبتدا دن صکره وضع اولنور

( یر متحرکدر و کونش ثابتدر ) کبی تنکم مثال مذکورده  
واقع ( متحرک و ثابت ) صفتلری ( یر و کونش )  
لفظلرینه اسناد قلمش اولدیغندن صفات مذکورده  
خبر اولمش اولور

### فائده

خبرلر دائماً ضمیر نسبیله مقارن اولدیغندن جمله اسمیهلرک  
دخی متکلم و مخاطب صورتلرنده مبتدا ایله خبر بیلننده  
مطابقت لازمه دندر

یعنی مبتدا مفرد اولدیغی صورته خبر دخی مفرد و جمع  
اولدیغی تقدیرده خبر دخی جمع صورتنده کتورلمک  
لازم اولور

مثال ( بن کاتبم سز شاعر سکز ) کبی  
فقط غائب صورتلرنده مطابقت مذکورده معتبر اولدیغندن  
مبتدا هر نقدر جمع اولور ایسه ده خبر مفرد صیغه سنده  
دخی کتورلمک جائز اولور

( افندیلر کاتبدر ) و یا خود ( کاتبدرلر ) کبی  
جمله فعلیهلرده اولدیغی مثللو جمله اسمیهلرده دخی بعض  
کره بر قاج خبر عطف واسطه سیله یالکز بر مبتدایه نسبت  
واسناد اولنه بیلور

بو صورتده ضمیر نسبی اکثری مؤخر کتور یلان خبره  
علاوه قلمیق شیوه لساندندر

( فلان ذات ادیب و کاملدر ) کبی و بعضاً دخی متعدد  
مبتداره یالکز برخبر اسناد اولنه بیلور

صورت مذکوره ده مبتداردن بری اکر متکلم اولور ایسه  
خبر جمع متکلم صورتنده واکر مخاطب اولور ایسه جمع  
مخاطب صیغه سنده کتورملک و بونلرک اک اشرفی خبره  
قریب وضع اولنق قاعده دندر

( برادریم و بن کاتیز قرنداشک و سن شاعر سکز ) کبی  
تعدد ایدن مبتدار غائب اولدیغی تقدیر ده خبر اکثری  
جمع صورتنده اتیان اولنور

( افندی و مخدومی کاتیدرلر ) کبی فقط ادات تردید ایله  
تعدد ایدن مبتدارلرک خبری دائماً مفرد اوله رق کتورملک  
واک اشرفی خبره قریب وضع اولنق لازمه دندر

( افندی و یاخود مخدومی عالمدر سن و یاخود بن شاعرم ) کبی  
عطنی شامل اولان نفی مکرر صورتنده خبر جمع  
صیغه سنده دخی کتوزیله بیلور

( نه قرنداشم و نه بن کاتیم ) و یاخود ( کاتیز ) کبی  
صورت مذکوره ده خبرلر دائماً مثبت اوله رق اتیان  
اولنه جفغندن نفیله استعمالی غلطدر

### تنبیه

مبتدا ایله خبر ایکسیده الفاظ عربیه دن اولوبده مبتدا  
مؤنث لفظیلردن بولندیغی حالده مبتدا ایله خبر بیلننده  
مطابقت لازم دکلدور

بو صورتده کره ارض متحرکدر (دینلوب) کره ارض  
متحرکهدر) دنيله من فقط مبتدا مؤنث حقیقیلردن اولدیغی  
حالده مطابقت ره رعایت اولنه رق (فلان خاتون عقیقهدر  
وعاقله در) دینلور

بولندیسکره معلوم اوله که جمله لر نسبت جهتیله دخی  
( اخباری انشائی ) قسملرینه منقسم اوله رق ایکی نوعدر

### جمله اخباریه

صدقه و کذب محتمل اوله رق بر شیئک وقوع و یا عدم  
وقوعی اخبار و اشعار ایدن جمله در

( انسان فانیدر باقی دکلدور ) نتکم مثال مذکور ایکی  
جمله بی شامل اولوب جمله اولاده فنانک انسانه ثبوتی  
و جمله ثانیده بقانک عدم ثبوتی اخبار و اشعار اولندیغی  
و بو اخبارک نفس الامرده صدقه و کذب احتمالی بولندیغی  
جهتله مذکور جمله لر اخباری قیلندن اولمش اولور

### تنبیه

مسند ایله مسند الیه بیننده معتبر اولان نسبت خبریه  
خارجیه ونفس الامرہ موافق اولدیغی صورتده اول کلامه  
صادق واولدیغی تقدیرده کاذب ذیلور  
( کونش پارلقدیر ) و ( آتش صغوقدر ) کبی شکم جله  
اولاده نسبت خبریه نفس الامرہ موافق اولدیغندن کلام  
صادق و جله ثانیہ ده نسبت خبریه نفس الامرہ مطابق  
اولدیغندن کاذب اولور

### جمله انشایه

صدقه و کذبہ محتمل اولیه رق بر فعلی انشا و ایجاد دلالت  
ایدن کلامدرکه ( طلبی . استفهامی . تمنی . و تنبیہی ) قسملرینه  
منقسم اوله رق درت نوعدر  
( انشائی طلبی ) بر فعلک خارجده حصولی و یا ترکی  
امر و طلبه دلالت ایدن جله درکه امر حاضر و امر غائب  
صیغه لرندن یاپیلور  
( درسه چالش و قشکی بیهوده پکورمه ) کبی شکم مثال  
مذکور ایکی جله یی شامل اولوب جله اولاده فعلک  
حصولی و جله ثانیہ ده ترکی طلب اولندیغندن مذکور  
جمله انشائی طلبی قبیلندن اولور

### ❦ فائده ❦

انشائی طلبیده ملحوظ و معتبر اولان طلب اکر استعلا و تنبیه طریقیله وقوع بولور ایسه اکا ( امر ) دینلور نتم بيوککر طرفندن چکوککر ایراد اولنان او امر کبی و اکر طلب مذکور عجز و تضرع طریقیله وقوع بولور ایسه اکا ( دعا ) دیر لر نتم چکوککر طرفندن بيوککره عرض اولنان استرحام و استدعال کبی و اکر طلب مذکور اخطار و تساوی طریقیله وقوع بولور ایسه اکا دخی ( التماس ) دینلور نتم اقراندن اقرانه اولنان توصیه و اخطارات کبی

### ❦ انشائی استفهامی ❦

بر فعلک وقوع و یا عدم وقوعی سؤال و استفساره دلالت ایدن جمله در که مسند لک یعنی جمله فعلیه ده فعل لک و جمله اسمیه ده خبر لک آخرینه ( می ) ادات استفهامیه سنک علاوه سیله و یا خود جمله لک اولنه بر ادات استفهام زیاده سیله یا پیلور

( مکتبه کیدیور میسکز . درسکز حسابمیدر . کیمدن او قویور سکز ) کبی نتم جمله اولاده فعلک و جمله ثانیه ده خبرک آخرینه ( می ) اداتی زیاده و جمله ثالثه نک دخی اولنه بر ادات استفهام علاوه سیله فعلک حصولندن

سؤال قلتمش اولديغندن مذکور جمله لر انشائی استفهامی  
قبیلندن اولمش اولور

### تنبیه

کړک جمله فعلیه وکړک اسمیه لږده (می) اداتی دائماً ضمیر  
نسبیلردن اول کتور ملک لازمه دن ایسه ده فعل شهو دیلر  
ایله شرطیلر ده ضمیر لر دن صکره وضع اولنقی و افعال  
مرکبه ده جزء اولک آخرینده زیاده قلنقی شیوه لساندندر  
(مکتب آچلدیمی درسه باشله سقیمی خواهه که جگمی ایدی)  
کبی که برنجی و ایکنجی جمله لږده ادات استفهام ضمیر لر دن  
صکره وضع اولنمش و اوچنجی جمله ده دخی جزء اولک  
آخرینده زیاده قلنمشدر

### نشائی تمی

رفلک وقوع و یاخود عدم وقوعی رجاو تمییه دلالت  
ایدن جمله در که فعل تمی و التزامی صیغه لرندن یاپیلور  
(تحصیل هنر ایتلیسک که سعادت حاله نائل اوله سک)  
کبی مثال مذکورده جمله اولی فعل التزامی و جمله ثانیه  
فعل تمی صیغه لرندن ترکیب ایتمش اولدیغندن مذکور  
جمله لر انشائی تمی قبیلندن اولمش اولور

### انشائی تنبییه

ادات ندا و تنبییه ایله قسمه مقارن اولان جمله لر در

مثال ( ای کنجدر حال حاضرده تحصیل کمال ایتز ایسه کز  
قسم ایدرم که استقبالده زجت چکر سکرز ) کبی نشکم  
ترکیب مذکور ( حال حاضرده تحصیل کمال ایدیکز که  
صکره زجت چکمیہ سکرز ) تقدیرنده اولدیغندن انشائی  
قبیلندن اولور

بوندن صکره معلوم اوله که جله لر کیفیت جهتیه دخی  
( اصلیه و فرعیه ) قسملرینه منقسم اوله رق ایکی نوعدر

### جمله اصلیه

مقصد اصلی بی مشتمل اولان جمله در که آنلرده باشلوجه  
ایکی قسمدر ( ابتدائی جزائیہ ) ابتدائیہ لفظاً و معنأً  
ماقبلنه اتصال و ارتباطی بولنمیان جمله در که دائماً اوائل  
کلامده بسط و ایراد اولور

( جمله جزائیہ ) مضموننک وقوعی دیگر بر جمله نك وقوع  
مضمونیه مشروط و مقید اولان جمله در

بونلری تقیید ایدن جمله لره دخی شرطیه دینلور که دائماً  
افعال شرطیه دن ترکیب ایدوب جزالردن اول کتوریلور  
مثال ( علم و کمال تحصیل ایدرسک سعادت حاله نائل  
اولورسک ) کبی

### جمله فرعیه

جمله اصلیه نك ارکان واجزاسندن برینک معناسنی تقیید



وایضاح ایدن جمله در در که آنلرده باشلوجه ( وصفیه .  
استینافیه . تفصیلیه . تفسیریه . تمثیلیه . معترضه )  
قسملرینه منقسمدر

### جمله و صفیه

جمله اصلیه و یا خودارکان واجزاسندن برینک معناسنی توصیف  
و بیان ایدن جمله در که صفت مقامنده استعمال اولور مثال  
( بر آدم که فضائل علم و ادب له متصف اولور هر یرده  
عزیز و محترم طوتیلور ) کبی تنکم مثال مذکور ( فضائل  
علم و ادب له متصف اولان آدم هر یرده عزیز و محترم طوتیلور )  
تقدیرنده اولوب جمله اولی صفت مقامنده بوانه درق نائب  
فاعلی توصیف و بیان ایتمش اولدیغندن ( وصفیه ) قیلندن  
اولش اولور

### جمله استینافیه

کلام سابقدن تولد ایدن سؤال واستدرا که جواب  
اوله درق استدلال مقامنده بسط و ایراد اولنان جمله در  
( فضائل علم و ادب دن عاری اولان آدم هر یرده ذلیل و حقیر  
اوله جفنده شبهه یوقدر زیرا انسانک شرف و اعتباری  
انجق علم و ادب له انصافنه منوطدر ) کبی  
تنکم مثال مذکورده واقع جمله ثانیه سیاق کلامدن  
متولد سؤال مقدره جواب اوله درق استدلال مقامنده

کتورلدیکنندن جله مذ کوره استیناف قیلندن اولمش اولور

### جله تفصیلیه

جله اصلیه و یاخود ارکان و اجزاسندن برینک معناسی

بیان و تفصیل ایدن جله در مثال

( یرک قوه انبساطیه سی هر اقلیمده بر دوزی یه دکدر

نشکم ممالک حاره طوپراقلری غایت منبت اولوب قطبلره

طوغری کیدلدکجه فیض و برکت رفته رفته تنزل ایدر )

کبی مثال مذ کورده واقع جله ثانیه جله اولانک

ارکانندن مبتدائی شرح و بیان ایتمش اولدیغندن جله

مذ کوره تفصیلیه قیلندن اولمش اولور

### جله تفسیری

جله اصلیه و یاخود ارکان و اجزاسندن برینک معناسی

تفسیر و ایضاح ایدن جله در ( انسان فکر و نظره ممالک

بر نوع حیواندر یعنی انسان عقل و فکر واسطه سیله

برچوق ایشلرک عهده سندن کله بیلور بر نوع حیواندر )

کبی نشکم مثال مذ کورده جله ثانیه جله اولانک

مضموننی تفسیر و ایضاح ایتمش اولدیغندن تفسیری

قیلندن اولمش اولور

### جله تمثیلیه

اصلیه نک و یاخود ارکان و اجزاسندن برینک معناسی

تمثیل و تشبیه طریقیله بیان و ایضاح ایدن جمله در  
( انسان فکر و نظره مالک اولدیغندن بر طاقم امور  
معظمه نك عهده سندن كله بیلور مثلا قوت و قدرتیجه  
کندوسندن بر قایق قات زیاده اولان حیوانلری بيله بعض  
تدابیر عقلیه واسطه سیله ایشنده قوللانور ) کبی شکم  
عباره مذکورده جمله ثانیه جمله اولانك مضمونی تمثیل  
طریقیله ایضاح و بیان ایتمش اولدیغندن جمله مذکورده  
تمثیلیه قبیلندن اولمش اولور

### جمله معترضیه

بر جمله نك ارکان و اجزاسی بیننده و یا خود بر برینه مربوط  
ایکی جمله میاننده اتیان اولنان جمله درکه ( تنبیه و تنزیه )  
و یا خود ( دعا و استعطاف ) مقررلنده استعمال اولنور  
مثال ( بنده کز ( الله قسمت ایدر سه ) برده بلاغت  
رساله سی یازه جغم ) کبی

خفی اولمیه که بالاده ذکر اولنان جمله لردن بشقه جمله  
حالیه و شرطیه لر دخی جل فرعیه دن صاییلور  
بوندرصکره معلوم اوله که جمله لر معنا جهتیله دخی  
( مطلقه و مقیده ) قسملرینه منقسمدر

### جمله مطلقه

یا لکز اجزای اصلیه سیله مراد و مقصودی ادا و افاده  
ایدن جمله لردرکه بونلره ( تامه ) دخی دیرلر

مثال ( یکر ویدر کونش پر لاقدر ) کبی نیکم جل مذ کوره  
برقید ایله مقید اولیه رق مراد و مقصودی تمامیه افاده  
ایتمش اولدقلرندن مطلقه قییلندن اولمش اولور لر .

### جمله مقیده

اجزای اصلیه دن بشقه بر طاقم قبود سائر علاوه سیله  
مراد مقصودی افاده ایدن جمله لردر که بونلره ( ناقصه )  
دخی دینلور مثال

( آی نوری کونشدن آلور ) کبی نیکم جمله مذ کوره  
مفعول به و دفعول منه ایله تقیید ایدلمش اولدیغندن ( مقیده )  
قییلندن صاییلور

ایمدی بروجده مشروح جمله لره علاوه قلنان قیدلره دخی  
( اجزای متممه ) دینلور که بونلر جمله تامه یه علاوه  
اولندقدن اجزای اصلیه دن برینک معناسنی تقیید و ایضاح  
و جمله ناقصه یه زیاده قلندقدن اجزای مذ کوره نک  
معنایینی اکمال و اتمام ایدر لر

اجزای متممه دخی باشلوجه ( مفعول . حال . تمیز . قیود  
اضافیه . قیود و صفیه . قیود کیه . قیود ظرفیه ) دن  
عبارت اولوب صورت استعماللری بروجده آتی بیان اولور

### مفعول

معلوم اوله که قیود کلامیه دن معدود اولان مفعولار دخی

ایکی نوعدر برینه (مفعول به صریح) دیگرینه (مفعول به غیر صریح) دینلور

مفعول به صریح

فعل کندوسی اوزرینه واقع اولان ذاتی اشعار ایدن لفظلردرکه آخرلرینه ماقبلی مکسور بر (یای) ساکنه علاوه سیله یاییلور بونلره (مفعول به) دیرلر مثال (کتابی آچدم درسمی او قودم) کبی

تنبيه

تعمیم ایچون بعض کره مفعول به لردن ادات مفعولک حذفی جائز اولور

مثال (پاره ویر کتاب آل) کبی فقط بوجهله ادات مذکورک حذفی یالکیز نکره لره مخصوص اولوب علملر ایله ضمائر واسم اشارتلردن یاییلان مفعول بهلردن حذف اولنه من ننکم (بنی کور اجدی چاغر شونی ویر) ترکیبلرنده ادات مفعولک حذفی جائز دکلدر

مفعول به غیر صریح

فعلک معناسنی تقیید و تخصیص ایدن مفعوللردرکه آنلرده بشدر (مفعول الیه • مفعول فیه • مفعول منه • مفعول له • مفعول معه)

### مفعول الیه

اجرا اولنان فعلک غایت ونهایتی اشعار ایدن لفظدر که  
 آخرینه بر ( های ) رسمیه علاوه سبله یاپیلور  
 مثال ( مکتبه کیت درسه چالیش ) کبی فقط ضمیر  
 شخصیلرک مفرد لیله اسم اشارت لرک مفعول الیه صورتلرنده  
 ادات مفعول ( های ) رسمیه اولمبوب مستثنا اوله رق  
 بونلر دائم صاغر ( کاف والـف ) الیه یازیلور ( بکا سکا  
 اوکا شوکا بوکا ) کبی

### املا

کـرک مفعول به و کرک مفعول الیه یاپیله جق اولان  
 الفاظک آخرلرنده حروف املا دن بر حرف بولندبغی  
 حالده ادات مفعول دن اوّل بر ( یای ) وقایه کتورلرک  
 اصول املا دندر

مثال ( قپویه کیت شوتد کره یی ناظر پاشایه ویر ) کبی  
 فقط اسم اشارت لرک ( مفعول به و مفعول فیه و منه )  
 صورتلرنده ( یای ) وقایه یرینه ادات مفعول دن اوّل  
 بر ( نون ) کتورلرک شیوه لساندندر ( شونی بونی اونی  
 شونده بونده اونده شـوندن بـوندن اوندن ) کبی کذلک  
 آخرلرنده ( کی ) اداتی بولنان لفظلرک مفعوللرنده ادات  
 مذکورک ( یاسی ) حذف اولنوب یرینه بر ( نون ) وقایه

کتوریلەرک (بزمکنی • بزمکنه • بزمکنده • بزمکندن)  
دینلور

بعض کره عربی و فارسی قاعده لری اوزره الفاظ عربیه  
و فارسیه نك اولارینه (الی و تا) اداتلری زیاده قلنهرق  
برطاقم مفعولار یاپیلور که لسان ترکیده بونلر دخی مفعول  
ایده مقامنده استعمال اولنور

مثال (تابصباح درسه چالیشهرق الی آخرانهمر وقتی  
بویولده کچوره حکم) کبی

مفعول فیه

اجرا اولنان فعلک محل وزمانی اشعار ایدن لفظدر که  
آخرینه بر (ده) علاوسیله یاپیلور  
مثال (اوتده بروده بوش کزمه اوده اوتور درسه چالاش)  
کبی

بعض کره الفاظ عربیه و فارسیه نك اولارینه (فی و در)  
اداتلری زیاده قلنهرق برطاقم مفعولار یاپیلور که لسانمزد  
بونلر دخی (مفعول فیه) مقامنده قوللانیلور مثال  
(دردست تحریر اولان اوراق فی الحال یازلدی) کبی  
وبعضاً دخی اسمای عربیه نك آخرینه بر (تنوین) زیاده  
قلنهرق (مفعول فیه) کبی استعمال اولنور  
(واقعاً ظاهراً حقیقه) کبی که فی الواقع فی الظاهر

فی الحقیقه دیمکدر فقط بومقوله مفعولار لسان ترکیده  
اکثری بلا تنوین استعمال اولنور ( واقعاظاهرا غالباً ) کبی  
بوصورتمده آخرلرنده ( تائی ) ککرد بولنان کلمه لرده  
اول ( تائی ) کرد ( تائی ) طویل شکلنده یازلق اصول  
املا دندر

( حقیقه عاقبة حقیقت عاقبت ) کی

مفعول منه

اجرا اولنان فعلک منشأ و مبدئی بیان و اشعار ایدن  
لفظدر که آخرینه ( بردن ) علاوه سیله یاپیلور  
مثال ( کوزدن اوزاق اولان ککوکادن دخی اوراق  
اولورمش ) کبی

و بعضاً دخی الفاظ عربیه و فارسیه نک اولارینه ( من . عن .  
واز ) ادا تلمری زیاده قلنه رق برطاقم مفعولار یاپیلور که  
لسان ترکیده بونلرده ( مفعول منه ) مقامنده استعمال  
اولنور

مثال ( من القدیم عن قلب ازهر جهت سزى سورم ) کبی

مفعول له

اجرا اولنان فعلک سبب و علتی اشعار ایدن لفظدر که  
آخرینه بر ( ایچون ) علاوه سیله یاپیلور



مثال ( بورساله مبتدیلر ایچون یاپلیدی ) کبی  
 الفاظ عربیه و فارسیه نك اولارینه بعض کره ( ل و برای )  
 اداتلرینک علاوه سیهله دخی برطاقم معمولار یاپیلور که  
 بونلرده اسمان ترکیده ( مفعول له ) مقامنده قوللانیلور  
 مثال ( لمصلحه و برای مصلحت ) کبی

### ❦ مفعول معه ❦

اجرا اولنان فعلک واسطه و مشارکنی اشعار ایدن لفظدرکه  
 آخرینه ( برایله ) زیاده سیله یاپیلور  
 مثال ( سعی و غیرت ایله انسان هراومدیغنه نائل اولور )  
 کبی

### ❦ املا ❦

بعض کره ( ایله ) اداتندن ( الف و یا ) ایکیزی بردن  
 حذف اولنه بیلور ایسه ده مضافلره مشابه اولدیغندن  
 یالکز ( الفک ) حذفی جائز اوله مز بوضورتده ( قلمله  
 قلمتراشله ) دینلوب ( قلمیله قلمتراشیه ) دینله مز فقط  
 آخرنده حروف املا دن بری بولنان لفظلرده مشابهت  
 مذکورده بولنمادیغندن یالکز ( الفک ) حذفی دخی جائز  
 اوله رق ( اوردویله عربیه یله ) دینله بیلور  
 الفاظ عربیه و فارسیه نك اولارینه بعض کره ( مع . ب . و یا )

اداتلرینک علاوه سیهله دخی بر طاقم مفعولار یاپیلور که  
 بونلرده لسانزده ( مفعول معه ) کبی استعمال اولنورلر  
 مثال ( باراده سینه ملکیه مکتبی کشاد اولنهرق  
 مع مدیر هیئت تعلیمیه سی بالتعین درسره شروع اولندی )  
 کبی

وبعضاً دخی عربی مصدرلرک آخرینه بر ( تنوین ) زیاده  
 قلنهرق ( مفعول معه ) مقامنده قوللانیلور  
 مثال ( فرمان عالیینه امثالاً بوکون امتحانلره باشلانندی )  
 کبی بالامثال دیمکدر

### تنبیه

معلوم اوله که کربک جمله فعلیه و کربک اسمیه لرده مسندلری  
 تقید و تخصیص ایدن مفعولار نظم طبیعی اوزره مسندلردن  
 اول و مسند الیه دن صکره وضع اولنلق ایجاب ایدر  
 ایسه ده بر نکته یه بناء بعض کره دخی تقدیم و تأخیر  
 اولنورلر

مثال ( بورساله یی بن مبتدیلر ایچون یازدم ) ( بن مبتدیلر  
 ایچون یازدم بورساله یی ) کبی  
 فقط مسند الیه لری تقید و تخصیص ایدن قیود جمله  
 دائماً مسند الیه ک اوزرینه تقدیم اولنلق لازمه دندر

مثال ( بر مکتبه دوام ایده رک شهادتنامه یه نائل اولمق  
نه بیوک نعمتدر ) کبی

قیودات مذکوره دن بر جمله ده هم مفعول به و همده  
مفعول الیه بولنوبده بر نکته ملاحظه اولندیغی حالده  
مفعول به دائماً مفعول الیه اوزرینه تقدیم اولنور

مثال ( بوکتابی بن سزه هدیه ایتدم ) کبی  
فقط مفعول به الیه مغاعیل سائرده دن بری بولندیغی صورتده  
اقتضاسینه کوره بونلر مفعول به اوزرینه تقدیم اولنمق  
شیوه لساندندر

مثال ( دون مکتبه بن سزری کوردم ) کبی  
عطف واسطه سیله برجنسندن اوله رق مفعولارک تعددی  
دخی جائزدر

مثال ( جناب مولایری و کوکاری آلتی کونده یاراتدی )  
کبی

بومقوله برلرده ادات مفعول بعض کره یالکز مفعول اخیره  
علاوه قلموب دیگرری ( الیه ) اداتبله استعمال اولنور

( جناب مولایری الیه کوکاری آلتی کونده یاراتدی ) کبی  
وبعض کره دخی مقام استعجالده ( الیه ) اداتیده ترک

ایدیلوب یالکز عطفله اکتفا اولنور  
( جناب مولایری و کوکاری آلتی کونده یاراتدی ) کبی

### حال

اجزای جمله دن مسند الیهلک حال و هیئتنی بیان و اشعار  
ایدن لفظلردر که اجزای مذکوریه ( ذی الحال )  
و بونلرک هیئتلرینی بیان ایدن لفظلره دخی ( حال )  
دینلورکه ( منقله و دائمه ) قسملرینه منقسمدر

### حال منقله

فعلک اجر اسندن صکره ذی الحالدن افتراق ایدرک زائل  
اولان حالدرکه فعل تمنی غابلرک آخرینه خفیفلرده ( رک )  
و ثقیللرده ( رق ) اداتلرینک علاوه سیله یاپیلور  
مثال ( چوجقلرده بن مکتبه کوله رک اوینایه رق کیدر  
و درسمی سوینه رک ازبر ایدر ایدم ) کبی

فعل تمنیلردن بشقه بعض فعللرک غائب صیغهلرینه  
( ایکن ) اداتنک علاوه سیله دخی برطاقم حال یاپیلورکه  
بونلرده منقله نوعدن صاییلور

مثال ( بن مکتبه کیدر ایکن خواجهیه راست کلدیم ) کبی

### املا

بعض کره ( ایکن ) اداتندن ( الف و یا ) ایکیسی بردن  
حذف اولنهرق استعمال اولنور

مثال ( بن مکتبه کیدر کن سزی کوردیم ) کبی

فقط مضافره مشابیه اولدیغندن یالکز ( الفک ) حذفی  
جائز اوله من

### ❦ حال دائمه ❦

فعلک اجراسندن صکره ذی الحالدن افتراق ایتمیان  
حالدرکه اکثری صفات عربیه نک آخرینک بر ( تنوین )  
زیاده سیله یاپیلور

مثال ( برشاکرد مکتبه ممنوناً کیدر و درس لرینه متمادیاً  
چالیشور ایسه فیضیاب اولور ) کبی

وبعضا دخی اسملرک آخرینه ( ایکن ) ادا تنک علاوه سیله  
بر طاقم حال یاپیلور که بونلرده اکثری حال دائمه مقامنده  
قوللانیلور

مثال ( بن سنک پدرک ایکن سوزیمی طوتمدک ) کبی  
وبعض کره دخی مصدر ترکیه نک آخرینه بر ( سزین )

اداتی کتوریلرک حال مقامنده قوللانیلور

مثال ( دوشتمکسزین لاقردی سونلک خطادر ) کبی

### ❦ تنبیه ❦

برجهلده عطف واسطه سیله حاللرک دخی تعددی  
جائزدر فقط ( ایکن ) اداتیه تعدد ایدن حاللرده ادات  
مذکور اکثری ترک اولنوب الک صکره کتوریلان حاله  
علاوه قلندر ق ربط مقامنده قوللانیلور

مثال ( سایه شاهانده هر طرفه متعدد مکتبلر موجود  
و کشاده و تحصیل ایچون هر درلو واسطه لر حاضر  
و آماده و نثر معارف اغورنده مصروف بیوریلان  
همت و غیرت لر فوق العاده ایکن بونعم جلیله دن استفاده  
ایدلماسی دنیا و عقبا ده موجب ندامتدر .

### تمیز

نسبتدن ابهامی رفع و ازاله ایدن لفظدر که مطلقاً مصادر  
و اسملرک آخرینه ( جه ) اداتک علاوه سیله حاصل اولور  
مثال ( معارفه آوروپالور چوق ترقی ایتدیلر ) کبی  
و بعضاً دخی اسمای عربیه نک آخرینه بر ( تنوین )  
علاوه سیله تمیز یاپیلور ( سنأ بن سندن بیو کم ) کبی  
و بعض کره ده اسملرک آخرینه ( جهتیله ) لفظی علاوه  
قلندرق تمیز مقامنده قولانیلور .

مثال ( معارف جهتیله بز چوق کیر و قالدق ) کبی

### تنبيه

عطف واسطه سیله تمیزلرک دخی تعددی جائزدر  
فقط ادات تمیز اکثری الک صکره کتوریلان تمیزه الحاق  
اولنور .

مثال ( صنایع و معارفه بزترقی ایده مدک ) کبی

### ❦ قیود اضافیه ❦

اجزای جمله دن برینک معناسنی تخصیص و بیان ایدن  
لفظلردر که اول لفظه ( مضاف الیه ) و تقید و تخصیص  
اولنان لفظه دخی ( مضاف ) دینلوب بونلرک مجموعنه  
بردن ( ترکیب اضافی ) دیرلر

ایمدی ترکیب مذکور لسان عثمانیده ( ترکی عربی و فارسی )  
قاعدہ لرینه توفیقاً اوچ وجهله استعمال اولندیغندن  
هر برینک قواعد مرعیه سی بوجه آتی بیان اولنور

### ❦ ترکیب اضافی ترکی ❦

اسمای ترکیه و یا عربیه و یا خود فارسیده نک آخر لرینه  
بر طاقم ضمیر اضافیلر علاوه سیه یا پیلان مرکبلردر که  
جزء اوله ( مضاف الیه ) و جزء ثانییه ( مضاف ) دینلور  
بونلرک صورت ترکیبلرینه دخی ( اضافت ) تعبیر اولنور که  
( تخصیصیه و بیانیه ) قسملرینه منقسم اوله رق ایکی نوعدر

### ❦ اضافت تخصیصیه ❦

تملک و اختصاص معنارینی افاده و اشعار ایدن ترکیب  
اضافیدر

مثال ( بنم کتابم سنک کتابک آنک کتابی ) کبی نتکم  
مثال مذکورده ( بن سن او ) لفظلری ( مضاف الیه )

و کتاب لفظی دخی ( مضاف ) واقع اوله رق تملک  
طریقیه مضاف الیه نسبت قلمش اولدیغندن تراکیب  
مذکوره نك اضافلری تخصیصیه قبیاندن اولمش اولور

### تنبیه

اضافت تخصیصیه نك متکلم و مخاطب صورتلرنده تعمیم  
ایچون بعض کره مضافلردن ضمیر اضافی حذف اولنور  
مثال ( بزم کتاب سزک کتاب ) کبی و بعضاً دخی  
غائب صورتلرنده مضاف الیه دن ادات اضافت حذف  
اولنوب مضاف الیه مضاف الیهک مجموعی اکثری برشیئه  
علم اوله رق استعمال اولنور

مثال ( قیر قله سی غلطه سرایی ) کبی

### اضافت بیانیه

تملک و اختصاص معنارینی افاده ایتمیوب مضاف الیه  
مضافک نوع و جنسی بیان و اشعار ایدن ترکیب اضافیدر  
مثال ( چنار آغاجی زحل ییلدزی ) کبی نیکم مثال  
مذکورده ( چنار وزحل ) لفظلری مضاف الیه اولوب  
مضاف اولان ( آغاج و ییلدز ) لفظلرینک نوع و جنسلرینی  
بیان ایتمش اولدقلرندن تراکیب مذکوره اضافت بیانیه  
قبیاندن اولمش اولور



### تنبیه

اضافت بیانیہ لڑدہ مضاف الیہدن دائماً ضمیر اضافیلر حذف اولنور مثال سابقده اولدیغی کبی و بعض کره دخی هم مضاف الیه و همده مضافدن ضمیر اضافیلر حذف اولنه بیلور فقط بوصورتده مضاف الیه مضافک اصل و اساسی اولمق لازمه دندر

مثال ( التون ساعت و الماس کوپه ) کبی  
مضافلرک ( مفعول به و مفعول فیه و منه و مضاف الیه )  
صورتلرنده کذلک ضمیر اضافی حذف اولنوب یرینه  
بر ( نون ) وقایه کتوریلور

( کتابینی کتابنه کتابنده کتابندن کتابنک ) کبی  
فقط آخرنده حروف منفصله دن بر حرف بولنان مضافلرک  
( مفعول به و مفعول الیه و مضاف الیه ) صورتلرنده ضمیر  
اضافی حذف اولنمیدرق ( پدیرینی پدیرینه پدیرینک ) دینلور

### املا

اضافت ترکیه صورتلرنده مضاف و یاخود مضاف الیهک  
آخرنده حروف املا دن بر حرف بولنیدیغی تقدیرده  
مضاف الیهلرده ادات اضافندن اول دائماً بر ( ن )  
و مضافلرده بر ( س ) کتورلمک اصول املا دندر  
مثال ( یالی نک صفاسی بیغچه نک لاله سی ) کبی

### ترکیب اضافی فارسی

فارسی و یاعربی و یا خود بری فارسی دیگری عربی اوله رق  
ایکی لفظدن تشکیل ایدن مرکبلردر که جزء اوله (مضاف)  
و جزء ثانی به (مضاف الیه) دینلوب مضافک آخری دائماً  
مکسور و مضاف الیهک آخری ساکن او قونور

مثال ( چشم آهو • نور قر • آفتاب عالم • شوکت جم ) کبی  
نتکم مثال مذکور ده ( چشم نور آفتاب و شوکت )  
لفظلری مضاف و ( آهو قر عالم و جم ) لفظلری دخی  
مضاف الیه واقع اولدقلرندن تراکیب مذکوره اضافت  
فارسیه قبیلندن اولمش اولور

### املا

اضافت فارسیه صورتلرنده اگر مضافک آخرنده ( هی )  
حرفلرندن بری بولنور ایسه مضافلرک آخرینه بر ( همزه )  
مکسوره کتوریلور

( تبعه دولت والی ولایت ) کبی واکر ( او )  
حرفلرندن بری بولنور ایسه بر ( با ) ی مکسوره زیاده قلنور  
( صفای روح • ابروی دوست ) کبی

### تنبيه

اضافت فارسیه صورتلرنده بعض کره مضاف الیه مضاف

اوزرینه تقدیم اولنوب مجموعی بردن بر شیئه علم اوله رق  
استعمال اولنور

بونلره ( مرکب مزجی ) دیرلر که برکله کبی دائماً متصل  
اوله رق یازیلور

( میکده مغیچه • شاهراه • سیاب ) کبی

ترکیب اضافی عربی

ایکی لفظ عربیدن تشکل ایدن مرکبلر در که جزء اوله  
( مضاف ) و جزء ثانی یه ( مضاف الیه ) دینلوب مضافک  
آخری دائماً مضموم و مضاف الیه معرف باللام اوله رق  
استعمال اولنور

مثال ( دار الفنون شیخ الاسلام ولی النعم ) کبی  
تکم مثال مذکورده ( دار شیخ ولی ) لفظلری مضاف  
و ( فنون اسلام ونعم ) لفظلری دخی مضاف الیه واقع  
اولدقلرندن تراکیب مذکورده اضافت عربیه قیلندن  
اولور •

فائده

کرك اضافت ترکیه و کرك اضافت فارسیه صورتلرنده  
تابع اضافت یعنی بر قاج لفظک بر برینه اضافتلی جاژدر  
( افندینک برادرینک مخدومی • شرف مقام صدارت ) کبی

فقط اضافت عربیه صورتلرنده تتابع اضافت یالکز  
مضاف ایله مضاف الیهک مجموعی بر شیئه علم و یاخود  
صفت اولدیغی حالده جائز اوله یلور  
(شیخ الاسلام انام . طرف باهر الشرف دولتری) کبی

### ❦ قیود و صفیه ❦

اجزای جمله دن برینک معناسنی تقید و توصیف ایدن  
لفظلردرکه اول لفظه (صفت) و تقید و توصیف اولنان  
لفظه دخی ( موصوف ) دینلوب بونلرک مجموعنه بردن  
( ترکیب توصیفی ) دیرلر

ترکیب مذکور دخی اضافت صورتی کبی لسان عثمانیده  
اوج وجهله استعمال اولندیغندن هر برینک قواعد  
موضوعه سی بر وجه آتی بیان اولنور

### ❦ ترکیب توصیفی ترکی ❦

اسمای ترکیه و یا فارسیه و یاخود عربیه نك اولارینه  
برطاقم صفتلر زیاده سیله یاییلان مرکبلردرکه جزء اوله  
( صفت ) و جزء ثانی یه ( موصوف ) تعبیر اولنوب  
صفتلر دائما موصوفدن اول کتور یلور

( یازلمش کتاب کوزل مکتب . معلوماتلی خواجه ) کبی  
نتکم مثال مذکورده واقع ( یازلمش کوزل و معلوماتلی )

لفظلری صفت اولوب ( کتاب مکتب وخواجه )  
لفظلری تقیید و توصیف ایتش اولدقلرندن تراکیب  
مذکوره ( توصیفی ) قیلندن اولمش اولور

### تنبیه

لسان عثمانیده تأنیث و تذکیرده الفاظک مطابقتلری معتبر  
اولدیغندن قاعده ترکیه اوزره یاپیلان ترکیب توصیفیلرده  
صفتله موصوف بیننده مطابقت ملترمز دکلدز  
بوصورتده ( قدیم ملت ) دینلوب ( قدیمه ملت ) دینله مز  
فقط موصوف مؤنث حقیقیلردن اولدیغی تقدیرده مطابقت  
دخی جائز اوله بیلور

مثال ( عاقله قدین و عقیقه خاتون ) کبی

### فائده

معلوم اوله که قاعده ترکیه اوزره قوللانیلان صفتلر  
بعض ادات علاوه سیله ( مطلقه • مبالغه • مقایسه •  
تفضیلیه ) قسملرینه آریله رق بروجه آتی درت وجهله  
استعمال اولنور

### صفت مطلقه

بلامقایسه برشیثک و صفنی بیان و اشعار ایدن صفتلردرکه  
دائما موصوفدن اول وضع اولنور  
انسان کوزل مخلوقدر • یلانجیلیق چرکین خویدر ) کبی

### صفت مبالغه

بلامقایسه بر شئیك و صفنده مبالغه افاده ایدن صفتلر در که  
اولارینه ( چوق . پك . اك ) کبی لفظلرك علاوه سیله  
یایلور

( اك كوزل مخلوق انساندر . یلانجیلیق پك چركین  
خویدر ) کبی

### صفت مقایسه

مقایسه طریقیله بر شئیك و صفنی بیان و اشعار ایدن  
صفتلر در که اولارینه ( قدر . مثللو . کبی ) لفظلرينك  
علاوه سیله یایلور

( انسان قدر كوزل مخلوق یوقدر . یلانجیلیق کبی  
چركین خوی اوله مز ) کبی

### صفت تفضیلیه

مقایسه طریقیله بر شئیك و صفنده مبالغه و تفاضل افاده  
ایدن صفتلر در که اول شیئه (مفضل) و مقایسه اولان شیئه  
دخی (مفضل علیه) دینلوب آخیرینه بر (دن) علاوه سیله  
یایلور

( سخاوت شجاعتدن كوزل بر فضیلتدر ) کبی بعضی کره  
دخی صفتلرك اولانه برده (دها) لفظی علاوه اولنه رق  
( سخاوت شجاعتدن دها كوزلدر ) دینلور

### ترکیب توصیفی فارسی

ایکی لفظ فارسی و یا خود بری فارسی دیگری عربی اوله رق  
ایکی لفظدن تشکل ایدن مرکبلر درکه جزء اوله (موصوف)  
و جزء ثانی یه (صفت) دینلوب موصوفلرک آخری  
اصافت صورتلری کبی دائماً مکسور او قونور

مثال (بخت سیاه . طبع نازک . ماه منیر) کبی  
نتکم مثال مذکورده واقع (بخت طبع و ماه) لفظلری  
موصوف و (سیاه نازک و منیر) لفظلری دخی صفت  
اولدقلرندن تراکیب مذکورده توصیفی فارسی قیلندن  
اولش اولور

### املا

اضافت فارسیه صورتلرنده اولدیغی کبی قاعده فارسیه  
اوزره یاپیلان مرکب توصیفیلرده دخی موصوفک آخرنده  
(هی) حرفلرندن بر حرف بولنور ایسه موصوفلرک  
آخرینه بر (همزه) مکسوره کتور یلور  
(بنده قدیم . صوفی نادان) کبی واکر (او) حرفلرندن  
بری بولنور ایسه بر (یا) ی مکسوره زیاده قلنور  
(عبای کهنه . سبوی تهی) کبی

### تنبيه

قاعده ترکیه اوزره قوللانیلان مرکب توصیفیلرده

مطابقت معتبر اولدیغی مثللو قاعده فارسیه اوزره استعمال  
اولنان ترکیب توصیفیلده دخی صفتله موصوف بینده  
مطابقت ملترزم دکلدیر  
نتکم (خانه مذکور) دینلوب (خانه مذکور) دینله مز  
بو صورتده (طوپخانه عامره) کبی ترکیب لک استعمالی  
غلط صایلور

### ترکیب توصیفی عربی

ایکی لفظ عربیدن تشکل ایدن مرکبلردر که جزء اوله  
(موصوف) و جزء ثانی یه (صفت) دینلوب ترکیب  
مذکور طبق توصیفی فارسی کبی استعمال اولنور  
مثال (شرع شریف و طریق مستقیم) کبی نتکم مثال  
مذکورده واقع (شرع و طریق) لفظلری موصوف  
و (شریف و مستقیم) لفظلری دخی صفت اولدقلرندن  
تراکیب مذکورده توصیفی عربی قیلندن اولمش اولور

### تنبیه

قاعده عربیه اوزره تشکل ایدن مرکب توصیفیلده  
صفتله موصوف بینده مطابقت ره رعایت اولنقی لازمه دندر  
یعنی موصوف مذکر اولدیغی تقدیرده صفت دخی مذکر  
و مؤنث اولدیغی حالده صفت دخی مؤنث و تنبیه و جمع



اولدیغی صورتده صفت دخی تشیه وجمع کتورملک  
ایجاب ایدر

فقط جعلر مؤنث حکمنده اولدیغندن موصوف اولدقلری  
حالده صفت مفرد مؤنث دخی کتوريله یلور  
مثال ( طبیعت بشریه اخلاق حیده ) کبی

### ❦ فائده ❦

بوندن صکره معلوم اوله که صفتلر بسیط و مرکب قسملرینه  
منقسم اوله رق ایکی نوعدر

### ❦ صفات بسیطه ❦

یالکیز بر لفظدن عبارت اولان صفتلردر که بونلر صرف  
عثمانی رساله مزده ذکر و بیان اولندی

### ❦ صفات مرکبه ❦

ایکی لفظدن تشکیل ایدن صفتلردر که بونلر ده قاعده ترکیه  
اوزره یاپیلان بعضی مرکب توصیفیلر ده موصوفلرک  
آخرینه برادات نسبت علاوه سیله حاصل اولوب مجموعی  
بردن صفت بسیطه مقامنده قوللانیلان مرکبلردر

مثال ( قره کوزلی و بیاض چهره لی آدم ) کبی و بعضی  
کره دخی قاعده ترکیه اوزره یاپیلان ترکیب اضافیلر ده  
مضافلره بر صفت علاوه اولوب مجموعی بردن صفت  
بسیطه مقامنده قوللانیلور

مثال ( الی آچیقی واحسانی بول آدم ) کبی و بمضاً  
دخی قاعدۀ فارسیه اوزره یاپیلان مرکب اضافیلرده  
مضاف الیه مضاف اوزرینه تقدیم اولنوب مجموعی بردن  
صفت مقامنده استعمال اولنور

( پدروالا کهر . دولت دارا شوکت . پیروشن ضمیر ) کبی  
معموللری تقدیم اولنه رق فارسی امر حاضرلریله اسم  
مفعوللرندن یاپیلان وصف ترکیبیلر دخی صفات مرکبه دن  
صبایلور ( دلکشا . دلربا . جهان دیده ) کبی

### ❦ املا ❦

قاعدۀ فارسیه اوزرد شو ایکی صورتله یاپیلان صفات  
مرکبه نك جزلری ایکیمی بردن و یاخود یالکز بری  
بر هجالی اولوبده جزء اولک آخرنده حروف منفصله دن  
بر حرف بولمادیغی حالده اول جزلرا کثری برکلمه کبی متصل  
یازیلور

( دلشکسته . مالچاه . ماهیپکر . دلدار ) کبی  
فقط اجزای مذکوره کمثیرالهیجا اولدیغی صورتده تسهیل  
قرائت ایچون آیری آیری یازلمق مناسب اولور  
( پری پیکر . ملک منظر . بنده پرور ) کبی

### ❦ قیود مکيه ❦

اجزای کلامدن برینک کمیت و مقدارینی بیان و اشعار ایدن

لفظ در که اول لفظه ( عدد ) و کمیت مقداری بیان  
اولسان لفظه دخی ( معدود ) دینلوب مجوعه عنه بردن  
( ترکیب تعدادی ) دیرلر

مثال ( کره ارض غربدن شرقه طوغری دونه رک یکر می  
درت ساعتده بردور کامل اجرا ایدر ) کبی  
نتکم مثال مذکورده ساعت لفظی ( معدود ) و یکر می درت  
لفظ لری دخی ( عدد ) اولوب اجزای جمله دن مفعول  
فیهک کمیت و مقداری بی بیان ایتش اولدیغندن ترکیب  
مذکور تعدادی قبیلندن اولور

### تنبیه

مرکب تعدادیلرده لفظ ( معدود ) کرک ترکی و عربی و کرک  
فارسی اولسون هر حالده مفرد اوله رق استعمال اولنور  
بو صورته ( ایکی قپوجی بش مکتب سکز شا کرد )  
دینلوب ( ایکی قپوجیلر بش مکاتب ایکی شا کردان )  
دنیله مز

فقط لسان ترکیده مستعمل اولان اعداد عربیه معدود لریله  
برابر ترکیب توصیفی قبیلندن اولدیغندن بونلرده عدد  
ایله معدود بیننده مطابقته رعایت قلمق لازمدر مثال  
( رتبه ثانیه و صنف ثانی ) کبی

### ❦ قیود ظرفیه ❦

اجزای جمله دن برینک محل وزمانی بیان و اشمار ایدن  
لفظلردرکه بونلر اکثری (مفعول فیه) و بعضی کره دخی  
صفت مقامنده استعمال اولنورلر  
( یاز . قیش . کیجه . کوندز . اخشام . صباح )  
لفظلری کبی

### ❦ تنبیه ❦

معلوم اوله که بورایه قدر بیان اولنسان ( قیود متممه )  
اجزای جمله دن برینک معناسنی اکمال و اتمام ایلدینکی کبی  
بونلر بعضی کره دخی یکدیگری تقیید ایده رک بر برینک  
معنارینی بیان و ایضاح ایدرلر  
بوصورتده قیود مذکور هر نقدر اول لفظک متممی  
صاییلور ایسه ده بالواسطه ینه اجزای اصلیه دن برینه  
عائد اولور

### ❦ مرکب ناقص ❦

فاعل و نائب فاعله نسبتلری ملحوظ و معتبر اولمیوب قیود  
متممه دن بعضی کره مفعول آله رقی ترکیبده واقع اولان  
فعللردرکه بونلرده ( مصادر . افعال فرعیه . و افعال  
ربطیه لر ) دن عبارت اولوب صورت استعماللری بوجه  
آتی بیان اولنور

### مصادر

معلوم اوله که ترکیبده واقع اولان مصدر لر فاعل و نائب فاعله نسبت اولنه مدققری جهتهله هر نقدر اسم حکمنده ایسه ده بعض کره دخی مفعولاردن بریله تقید ایدیلرک فعل زمانیلرکی استعمال اولنور

(مکتبه کیتک . درسه چالشمق . مکافاته نائل اولمق) کی بوضورتده مفعولار دایما کندولرندن اول وضع اولنمق و برجنسدن اولانلرک عطف واسطه سیله تعددی جائز اولمق کی احوال مرعیه تمامیه مصدرلرده دخی جاری اولور

### افعال فرعیه

صفت مقامنده قوللانیلان ( اسم فاعل اسم مفعول و صفت مشبهه ) صیغه لریدرکه بونلر دخی فاعل و نائب فاعله نسبت اولنه میوب بعض کره مفعول آلهرق طبق مصدر لر کی استعمال اولنور لر

( دستی یی قیران ایله صوی کتورن بردر ) کی

### تنبیه

عربجه دن مأخوذ اولهرق لسان عثمانیده قوللانیلان افعال فرعیه ایله عربی مصدرلری دخی بعض کره مفعول آلوب الفاظ ترکیه کی استعمال اولنور لر

( پښتو ګرځه مرچت . پښتو ګرځه رعایت . قانون لره اطاعت .  
هر ګرځه واجبۀ ذمتدر ) کې

### افعال ربطیه

ربط مقامنده قوللانیلان برطاقم صیغه لر در که بونلرک هر نقدر  
فاعل و نائب فاعله نسبتلری وار ایسه ده نسبت مذکوره  
مقصود و معتبر اولیوب بعض ګرځه مفعول آله رق سائر  
فعللر کې استعمال اولنورلر

افعال مذکوره دخی ( تعقیبیه . توقیثیه . ابتدائیه .  
انتهائیه . تأکیدیه . حالیه . عطفیه . وصلیه ) صیغه لریدر که  
ترکیب و استعماللری بوجه آتی بیان اولنور

### صیغه تعقیبیه

کند و سندن صکره در عقب بر فعلک و قوعنی بیان و اشعار  
ایدن صیغه لر در که ادات مصدر حذف اولند قد نصکره باقی  
قلان ماده نك آخرینه نونك سکونیه بر ( نجه ) اداتک  
علاوه سیله یا پیلور نیکم ( مکتبدن کنجه درسمی از برلدم )  
دینلور که مکتبدن کنجه در عقب درسمی از برلدم دیمکدر

### املا

ماده اصلیه نك آخری متحرک اولان برلده ادات مذکور دن  
اول برده ( یا ) ی و قایه کتور ملک اصول املا دندر  
( استه ینجه . آراینجه . او قوینجه ) کې

بعض کره دخی فعل مضارع مفرد غائبك مثبت و منفی  
 صیغه لری بر لکده بولنه رق مجموعی بردن صیغه تعقیدیه  
 مقامنده استعمال اولنور

( مکتبدن کلور کلز درسمی از برلدم ) کبی

❦ صیغه توقیتیه ❦

کندوسنك مدت وقوعنده دیگر بر فعلك دوام وقوعنی  
 اشعار ایدن صیغه لردرکه ماضی شهودی جمع متکلم  
 صیغه سنك آخرینه بر ( چه ) اداتك علاوه سیله حاصل  
 اولور نتکم ( درسه چالشدیچه اعتبار بولورسك )  
 دینلدکده درسه چالشدیغك مدتجه دائماً اعتبار بولورسك  
 دیمکدر

❦ صیغه ابتدائیه ❦

بعدنده کلان بر فعلك بدایت وقوعنی بیان و اشعار ایدن  
 صیغه لردرکه فعل تمیلرک مفرد غائبسه ( لی ) اداتك  
 علاوه سیله یاپیلور نتکم ( مکتبه کیده لی درسه  
 چالیشیورم ) دینلدکده چالشمه مك ابتداسی مکتبه کیده لی  
 دیمکدر

بعض کره ( لی ) اداتندن صکره تأکید ایچون برده  
 ( بری ) لفظی زیاده قلوب ( کیده لی بری ) دینلور

### صیغهٔ انتهائیه

بعدنده کلان بر فعلک نهایت وقوعی بیان و اشعار ایدن  
صیغه لر در که ادات مصدر حذف اولند قدن صکره باقی  
قلان ماده نك آخرینه نونك سكونيله بر (نجیه) اداتی  
کتوریلوب بعده شو (دك . دکین . قدر) لفظلرندن  
برینك زیاده سیله یاپیلور تکم (بوکجه صباح اونجیه  
قدر اوتوردم) دینلده اوتورمق فعلی صباحه منتهی  
اولدی دیمکدر

### املا

صیغهٔ تعقیبیه لرده اولدیغی کبی بونلرده دخی مادهٔ اصلیه نك  
آخری متحرک اولان یرلرده ادات مذکوردن اول  
بر (یا) ی مکسوره کتوریلور (استه ینجیه . آراینجه .  
اوقوینجیه) لفظلری کبی

### صیغهٔ تأکیدیه

بعدنده کلان بر فعلک وقوعی تأکید و اشعار ایدن  
صیغه لریدر که فعل تمیلرک مفرد غائبلرینی مکرر اوله رق  
استعمالدن عبارتدر تکم (فلان ذات یازده یازده کاتب اولدی)  
دینلده انک کاتب اولسنه سبب متمادیاً یازمه سی دیمکدر

### صیغهٔ حالیه

بعدنده کلان بر فعلک کیفیت وقوعی اشعار ایدن



صیغه لر در که حال بخشنده بیان اولندیغی وجهله فعل تمنی  
مفرد غابلرک آخرینه خفیفلرده ( رک ) ثقیللرده ( رق )  
اداتلرینک علاوه سیه و بعض کره دخی دیگر فعللرک مفرد  
غابلرینک ( ایکن ) اداتنک زیاده سیه یاپیلور  
مثال ( عقلی اولان کیمسه الی وآیاغی طوتر ایکن کسب  
کمال ایدر و بیوکلرک نصیحتنی منکوش کوش ایدرک سمت  
مقصوده کیدر ) کبی

### صیغه عطفیه

بعدنده کلان فعل ایله کندیسنک فاعل وزمانلری متحد  
اولندیغی اشعار ایدن صیغه لر در که ماده اصلیه نک آخرینه  
بر ( وب ) اداتنک علاوه سیه یاپیلور تنکم ( او قویوب  
یازدم ) دینلده او قودم و یازدم دیمکدر

### املا

ماده اصلیه نک آخری متحرک اولان لرلده ادات مذکور دن  
اول برده ( یا ) یوقابه کتور یله رک ( استه یوب • آرایوب )  
دینلور

### صیغه وصلیه

صله وصفت مقامنده بولنه رق اجزای کلامدن برینی  
تعریف و بیان ایدن صیغه لر در که ماضی شهودی ایله  
مستقبلک مفرد غابلریند بر طاقم ضمیر اضافی علاوه سیه

حاصل اولور لر فقط شهودیلر ده ضمیر اضافیدن اوّل  
(س) یرینه خفیلر ده بر (کاف) فارسی وثقیلار ده  
بر (غ) زیاده قلنق کذلک مستقیلر ده بولنان (ق)  
غینه و (ک) دخی کاف فارسی به تبدیل اولنق شیوه  
لساندندر

( یازدبغی • چیز دیکی • یازه جغی • چیزه جکی ) کبی

خاتمه

بولندن صکره معلوم اوله که بر ماده بی اسباب موجب  
و تفرعات سائر سیله مخاطبه تفهیم و افاده ضمنیه ایراد  
اولنان نطق و عباریه ( مقاله ) تعبیر اولنور که یکدیگره  
متعلق بر طاقم فقره لر دن ترکیب ایدر

( فقره ) دخی مراد و مقصودی تمامیه ادا و افاده ایدن  
عباریه دیر لر که آنلر ده ( بسیط و مرکب ) قسملرینه منقسم  
اوله رق ایکی نوعدر

فقره بسیطه

قیود متممه سیله برابر یالکز بر جمله بی مشتمل اوله رق  
مخاطبه فائده تامه افاده ایدن سوزدر  
مثال ( علم و هنر هر برده معتبر و قیمتی بر کوهردر ) کبی

فقره مرکبه

بر برینه مربوط و متعلق ایکی و یا خود اوچ جمله بی شامل

اولان عبارہ در کہ جل مذکورہ دن بری ( اصلیه )  
دیگر لری ( فرعیہ ) قبیلندن اولوب فرعیہ لر قیود متممہ دن  
صایلور

مثال ( افراد بشرک سائر حیوانلردن فرق و تمیزی آنحق  
فضائل علیہ ایله در بوصورتده هر بر آدم اسباب لازمه  
تحصیلیه یه یاپیشه رق کندوسنی انواع مشترکه حیوانیه دن  
تفریقہ چالشملیدر ) کبی

تکم مثال مذکور ایکی جله یی شامل بر فقره  
مرکبه کبی اولوب جله اولی علت مقامنده بولندیغندن  
( فرعیہ ) وجله ثانیہ دخی ( اصلیه ) قبیلندن اولمش اولور  
بعض کره دخی بر فقرده ایکی جله اصلیه بولنه بیلور که  
بونلرک برینه ( اصلیه مطلقه ) دیگرینه دخی ( اصلیه مقیده )  
تعبیر اولنور

### فائده

بیان مذکور دن اکلاشلدیغی وجهله فقره مرکبه لری  
تشکیل ایدن جله لرک بر برینه تعلق و ارتباطلری بولنه جغندن  
بونلرک اکثری عطف طریقله ایراد اولنور لر  
بوصورتده جل مذکورہ اخباریت و انشائینده متحد اولمق  
و معطوف ایله معطوف علیہ بیلنرنده بر مناسبت بولمق  
لازمه دندر

بومناسبتده بعض کره اجزای جمله یه نظراً اولورکه بونلره  
مناسبت لفظیه دیرلر

نتکم اجزای مذکوره دن مسند ویا مسند الیملرک ویا خود  
قیود متممه دن برینک لفظاً اتحاد واتفاقلری کبی

مثال ( ابنای بشر مجرد نطق ولسان واسطه سیله مرامنی  
آخره تبلیغ ایلر وبالطبع افرادندن بولندیغنی قوم وقبیله نک

لسانی اوزره سـویلر برنوع حیواندر ) کبی  
نتکم مثال مذکور اوچ جمله یی شامل بر فقره مرکبه  
اولوب جل مذکوره نک مسند الیهلری متحد اولدیغندن  
ایکنجی جمله عطف طریقیه ایراد اولمشدر

وبعض کره دخی مناسبت مذکوره مضمرن جمله یه نظراً  
اولورکه بونلره دخی مناسبت معنویه دینلور

( مماثلت و مبانیت • سببیت و مسببیت • علیت و معلولیت )  
مناسبتلری کبی مثال ( عالم کامل هر یرده هنر و فضلله

معروف و معتبر و مرد جاهل مسقط رأسنده بیله علت  
جهلله مجهول و محقردر ) کبی

نتکم مثال مذکور ایکی جمله یی شامل بر فقره مرکبه  
اولوب جل مذکوره بیننده معنواجه مبانیت بولندیغندن

ایکنجی جمله عطف طریقیه ایراد اولمشدر  
بوصورتنده اخباریت وانشائیتمده مختلف اولان جمله لر

ایله مناسبات مذکوره دن بینلرنده هیچ برمناسبت بولنمیان  
جمله لر یکدیگره عطف وربط اوله میوب بونلر دائماً فصل  
طریقيله کتوريله رك هر بری مستقل برقره عد اولنور  
بوندن صکره معلوم اوله ~~که~~ قبود متمعنه دن بريله تقیید  
ایدیلان مرکب ناقصلره یعنی مصدرلر ایله افعال فرعیه  
وصیغه ربطیه لرك هیئت مجموعه سنه دخی ( فاصله )  
تعبیر اولنور که بونلر دائماً عطف طریقيله کتوریلوب  
برجمله ده نهایت اوچه قدر تعدد ایده یلورلر

مثال ( علم وکمال انسانه باعث فیض و اقبال اولدیغی  
و تعلیم و تعلم هر کسه برامر واجب الامتثال بولندیغی جهته  
روز و لیالاک بویولده کچورلمه سی مقتضای حالندلر ) کبی  
نتکیم مثال مذکور اوچ فاصله بی مشتمل برجمله اولوب  
برنجی و ایکنجی فاصله لر صیغه وصلیه و اوچنجی فاصله  
دخی مصدر دن تشکل ایدرك عطف وربطله ایراد اولنمیشلردلر

### تنبیه

فاصله لری تشکیل ایدن فعللر برجنسدن اولدیغی صورته  
بونلر اولکی فاصله لرده ترك اولنوب فاصله اخیره ده  
کتوريله رك ربط مقامنده قوللانیلور

مثال ( علم و معرفت انسانه آرایش وزینت و تعلیم و تعلم  
هر کسه واجبه ذمت اولدیغی جهته وقت و زمانلک  
بویولده کچورلمسی موافق عقل و حکمتدر ) کبی

تکم مثال مذکور اوج فاصله بی شامل برجه اولوب  
برنجی وایکنجی فاصله لری تشکیل ایدن صیغه وصلیه  
برجسندن اولدیغندن فاصله اولاده ترك ارلنهرق فاصله  
ثانیه ده کتورلمشدر

### فأده

بروجه مشروح مقالاتی تشکیل ایدن فواصل ایله جله  
وقفره لره ( ارکان اصلیه ) تعبیر اولنورکه بونلر مرکبات  
کلامیه نك اصل واساسیدر

اشته شوارکان مذکوره بی بربرندن تفریق وتمیز ایتک  
اوزره السنه سائرده برطاقم علامت مخصوصه وضع  
اولنمشدرکه بو علامت لرك صورت استعمالنه دخی  
( اصول تقیطیه ) دیرلر

فقط لسان عثمانیده بومثلو علامت لره هنوز موجود اولدیغندن  
( فاصله ۰ جله وقره ) لرك یکدیگردن تمیز و تفریق  
ایچون باشلوجه اوج درلو علامت فارقه نك اختراع  
و استعمالی لازم کلور

ارکان مذکوره بی بو وجهله تفریق ایتکه ( اصول  
تقیطیه ) دینلدیکی کبی کلمه لرك صرف ونحوه تطبیقیله  
تفتیش و معاینه لری خصوصنه دخی ( اصول تحلیلیه )  
دینلورکه صورت اجرایی جدول آتیده کوسترلشدر

## فقره

{ کندی لسانی او کر نمکسزین بشقه لسان تحصیلنه }  
 { هوس ایدنلرک اوینی بر اقوبده مسافر لکده کزنلر کبیدر }

الفاظ	تطبیقات صرفیه	تطبیقات نحویه
کندی	الفاظ ترکیه دن اسم مهم	لسانک مضاف الیهیدر
لسان	لفظ عربی اسم جنسدر	مضاف اولوب مجموعی مفعول بهدر
او کر نمک	ترکیه مصدردر	بوراده حال واقع اولمشدر
سزین	نقیله ادات حالدر	ذی الحالی ایدنلر نقطیدر
بشقه	ترکیه ادات استشاردر	بوراده صفت مقامنده مستعملدر
لسان تحصیل	ذکری سبقت ایتدی عربیجه تفعیل باندن مصدر	مفعول مقامنده مضاف الیهیدر مضاف اولوب مجموعی مفعول الیهیدر
هوس	لفظ عربی اسم جنسدر	ایدنلر فعلنک مفعول بهیدر
ایدنلر	ترکیه اسم فاعل جمعدر	قیود متممه سیله برابر مبتدا
او	لفظ ترکی اسم جنسدر	بر اقق فعلنک مفعول بهیدر
بر اقوب	ترکیه صیغه عطفیه در	کزنلر فعلی اوزرینه معطوف
ده	ترکیه ادات عطفدر	بوراده تأکید ایچون کلمشد
مسافر	مفاعله باندن اسم فاعلدر	کزنلر فعلنک مفعول فیهیدر
لک	اسم لری ده ادات مکاندر	صفتلر ده مصدریت ایچوندر
ده	ترکیه ادات ظرفدر	مفعول فیهلره داخل اولور
کزنلر	ترکیه اسم فاعل جمعدر	قیود متممه سیله برابر خبردر
کبی	ترکیه ادات تشبیهدر	مشبه بهلره لاحق اولور
در	ترکیه ادات نسبتدر	خبر لری مبتدایه ربط ایدر

ترکیب و تحلیل اصولک اجرایی ضمنده تمرین ایچون  
(مقالات)

برنجی مقاله

جناب مولاهر بر امرک حصولی بر سبیه ربط و املا بیورمش  
اولدیغندن بو عالمده سببسنز هیچ بر شی حصوله کله من  
نتکم ارباب زراعت وقت وزمانیله ترلا وبعجه رینه  
تخم اکوب خدمت لازمه سنی ایفایتمدیکجه محصوله دسترس  
اوله مدیغی کبی چوققلر دخی وقتیه بر مکتبه دوام ایله  
او قونان درسره احاله سمع اهتمام ایلدیکجه اکتساب هنر  
ومعرفت ایده من

ایکنجی مقاله

حسب البشریه ارتکاب اولنان بعض تقصیرات عادیه نک  
اسباب موجبیه سی کرچه معذرت مقامنده طوتیه بیلور  
ایسه ده جهل ونادانیدن نشئت ایتش اولان بر طاقم افعال  
قیحه نک عفووی خصوصی اصلا تجویز اولنه من  
زیرا نقایص انسانیه دن اولان جهالت اعذار مقبوله دن  
دکدر نتکم ارکان مشروعه بی بیلان بر کیمسه وظائف  
دینه دن معاف طوتیه مدیغی کبی بر مجرم دخی جهلی سبیه  
ایشلیدیکی قباحتک جزاسندن قورتیه من



### ❦ اوچنجی مقاله ❦

نوع بنی آدمی حیوانات ساڑه دن فصل و تفریق ایدن  
آنجق قابلیت علمیه در

ایشته شو خصلت فاضله یه نائل و مظهر اولان ذوات  
فضائل سماته حقیقه انساك تعریفی صادق و خاصه  
ممتازیت هر حالده کندسندن غیر مفار قدر

بوصورتده ماهیت انسانیه یی اکلا یوبده اسباب لازمه  
تحصیل یه یایدشوب کندوسنی انواع مشترکه حیوانیه دن  
تفریقه چالشیان کیسه لر صورتجه هر قدر انسانه مشابه  
ایسه ده سیرتجه حیوانات وحشیه قطارندن صایلور

### ❦ در دنجی مقاله ❦

نوع بنی آدمه عنایت و احسان بیوریلان جوهر عقل  
و عرفان نعم الهیه دن بر نعمت جلیله الشاندرکه آنک بهاسی  
هیچ بر مقیاس ایله تقدیر و توزین اولنه من

ایشته بویه بر جوهر عالی قدری تحصیل کالات انسانیه  
اوغرینه صرف ایتیوبده بر طاقم عبثیات و لهویات یولنه  
خرج و تلف ایدنله اسف اولنور

### بشنجی مقاله

منزل مقصوده واصل اولان ارباب دانش و فضائلک  
معلوملریدرکه لذا ئذ نفیسه علم و معارفی تذوق و استحصال  
ایتماش اولان زمره جهال هر نقدر رتبه و مال ایله  
دلسیر نوال اقبال ایسه ده ینه مرتبه سؤالده بولنان بر سائل  
کبی آج و محتاج اولدقلری بی ریب و اشکالدر

زیرا علمسز رتبه و غنا طبق خسته لره و یریلان اشربه  
فرح فزایه بکزرکه مختل الدماغ اولان خسته آنلردن لذت  
آله مدیغی کبی مرض جهل و نادانی یه مبتلا اولانلر دخی  
مال وجاهدن ذوقیاب اوله من

### التنجی مقاله

شو چرخ دوارک هر بر دقیقه و ساعتی تجدد ایتدیکجه بو عالم  
فایده نیجه بیک موجودات کونیه ظاهر و سر نما اولوب  
بونلردن هر بررلری برر صورتله وظیفه لرینی ادا و ایضا  
ایدرك سمت عدمه کیتمکده اولدیغی مثللو اشرف مخلوقات  
اولان انسان دخی فضائل علومیه ایله تزیین ذات ایدرك  
بودار فسادن صوب مقصوده کو چوب کیتمک مقتضای  
آفرینش حکمتدر

### بدنجی مقاله

هر شیئ حصولی بروقت مناسبه تعلیق و ترهین پیورلش  
اولدیغندن اول وقت مرهون حلول ایتدیکجه بوعالمده  
هیچ برشیء حصوله کله مدیکی کبی مروری تقدیرنده دخی  
تلافیء مافات ایدیه من

اشته انسانه ایکی جهانده باعث فیض و نجات اولان علم  
و کمالک موسم تحصیل دخی کنجلاک زمانیدر که شوزمان  
فیض اشتمال صبح کاذب کبی سریع الزوال اولدیغندن  
برکره پکوب کیتدکده آرتق اعاده سی ممکن اوله من  
بناء علیه شوزمان فیض نشانک قدر و قیمتی بیلوبده آکا  
کوره حرکت ایتک هر بر طفل نورسیده یه واجبه ذمتدر

### سکزنجی مقاله

برآدم متولد و متوطن اولدیغی مملکت و تابع و منسوب  
بولندیغی دولت و ملتک اسانی او کر نمکسزین السنه سائره  
تحصیلنه هوس ایتک کندی خانه سنی بر اقوبده کرا  
اولرنده سورتمک کبیدر

بناء علیه افراد عثمانیه دن اولدیغمز و خصوصیه تبعه  
سلطنت سنییه دن بولندیغمز جهتله اول امرده کندی  
لسانمزی کوزله او کر نوب بعده السنه سائریه مراجعتله  
توسیع دائره معلومات ایتکلکمز لازمه حالنددر

### سکزنجی مقاله

ظهور سلطنت عثمانیه دن بو آنه قدر اقطار شرقیه ده  
 زبانزد اولوب کسب اشتهار ایدن لسان ترکی فی الاصل  
 ( چغتای . عربی . فارسی ) لسانلرینک الفاظ  
 و شیوہ لرندن مرکب بر لسان عذب البیاندرکه سبک  
 و انشاسنک سلاست و لطافتی هیچ برو جهله انکار اولنه من  
 نه چاره که لسان مزبورک قواعد مرعیه سی برضابطه  
 حسنه تحتنه آله رق تعلیم و تعلی خصوصنده کسدرمه  
 بریول آچیله مدیغندن ابنای وطنک بر طاقی او قویوب  
 یازمه دن یوز چو یروب جهل و نادانیده قالمقده و بر طاقی  
 دخی موقوفی علیه ظن اولنان عربی و فارسی تحصیلنه مدت  
 مدیده طالدقدن صکره لسان مزبوری ینه در سنجه او قویوب  
 یازمه مدقلری مع التأسف کورلمکده در بناء علیه لسانمزک جهت  
 نظریاتی بر قاعده تحتنه آله رق تعلیم و تعلمک تسهیل  
 و تعمیمی خصوصنده بر چیغرا آچیلقی امور لازمہ دن  
 بولندیغندن بودفعه لسان ترکینک قواعد  
 اساسیه سنی مشتمل ایکی قطعه رساله  
 مختصره تحریر و املا اولنوب عاجزانه  
 ابنای وطنه اهدا قلمشدر

تمت

# در سعادت



مطبعة عثمانیه ده طبع اول نمشدر





